



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

09.10.2020թ.

**Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ՍՑ-ԼՕ-2020/201**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյան

Պատվիրատու՝ ՀՀ պաշտպանության նախարարություն
Մասնակից՝ «Դառես» ՍՊԸ

Մասնակցությամբ՝

ՀՀ պաշտպանության նախարարության ներկայացուցիչ՝ Ա. Բաղրամյանի
«Դառես» ՍՊԸ-ի ներկայացուցիչներ՝ Հ. Ենգոյանի, Ա. Պարանյանի

Գնման ընթացակարգի ծածկագիրը և առարկան՝

«ՀՀ ՊՆ-ԳՀԾՁԲ-20-2/5» ծածկագրով գնանշման հարցում, Շարժական թիրախային
բնագծերի վերանորոգման ծառայությունների ձեռքբերում:

ՀՀ գնումների հետ կապված բողոքներ քննող անձը (այսուհետ՝ նաև Բողոքներ
քննող անձ)՝ ուսումնասիրելով Հայաստանի Հանրապետության ֆինանսների
նախարարության կողմից 02.09.2020թ.-ի թիվ 26/26-1/13232-2020 գրությամբ «Դառես»
ՍՊԸ-ին (այսուհետ նաև՝ Մասնակից) գնումների գործընթացին մասնակցելու իրավունք
չունեցող մասնակիցների ցուցակում ներառելու նպատակով նախաձեռնված
ընթացակարգով ներկայացված հիմքերը,

Պ Ա Ր Զ Ե Ց

1. Գործի նախապատմությունը

ՀՀ ֆինանսների նախարարությունը, ՀՀ պաշտպանության նախարարության (այսուհետ նաև՝ Պատվիրատու) 28.08.2020թ.-ի թիվ ՊՆ/ՊՆ/02/2666-2020 գրության հիման վրա, 02.09.2020թ.-ին «Դառես» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին (Գ. Ներսիսյանին) գործը մակագրվել է 02.09.2020թ.-ին: 07.09.2020թ.-ին www.gnumner.am կայքում հրապարակված հայտարարությամբ գործը ընդունվել է վարույթ և տրվել թիվ ՍՑ-ՆԳ-2020/218 համարի ծածկագիրը:

Հիմք ընդունելով ՀՀ ֆինանսների նախարարի 14.09.2020թ.-ի թիվ 255-Ա Բողոքներ քննող անձ՝ Գ. Ներսիսյանին 2020-2021թ.-երի աշխատանքային տարվա ամենամյա արձակուրդ տրամադրելու մասին հրամանը, թիվ ՍՑ-ՆԳ-2020/218 համարի ծածկագրով ընթացակարգի քննությունը 15.09.2020թ.-ին փոխանցվել է Բողոքներ քննող անձ Լ. Օհանյանին:

16.09.2020թ.-ին www.gnumner.am կայքում հրապարակված հայտարարությամբ ընթացակարգը ընդունվել է վարույթ, տրվել թիվ ՍՑ-ԼՕ-2020/201 համարի ծածկագիրը:

23.09.2020թ.-ին, 02.10.2020թ.-ին և 09.10.2020թ.-ին նշանակվել են նիստեր:

Գործի քննությունն ավարտվել է 02.10.2020թ.-ին և Բողոքներ քննող անձի որոշման հրապարակման օր է նշանակվել 09.10.2020թ.-ին:

2. ՀՀ պաշտպանության նախարարության ներկայացրած փաստերը և դիրքորոշումը.

ՀՀ պաշտպանության նախարարությունը 28.08.2020թ.-ի թիվ ՊՆ/ՊՆ/02/2666-2020 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Հայտնում եմ, որ ՀՀ ՊՆ-ԳՀԾԶԲ-20-2/5 ծածկագրով գնման ընթացակարգի գնահատման արդյունքում 3, 4, 5, 6, 7, 8, 9 և 10-րդ չափաբաժինների մասով ընտրված (հաղթող) մասնակից է ճանաչվել «Դառես» ՍՊԸ-ն: «Գնումների մասին» ՀՀ օրենքի 10-րդ և 36-րդ հոդվածների պահանջների համաձայն անգործության ժամկետի ավարտից հետո

www.armeps.am համակարգի միջոցով «Դառես» ՍՊԸ-ին ներկայացվել է կնքվելիք պայմանագրի նախագիծը և ծանուցվել է պայմանագիր կնքելու վերաբերյալ, սակայն վերջինս սահմանված ժամկետում պայմանագիր կնքելու չի ներկայացել:

Հաշվի առնելով վերոգրյալը և հիմք ընդունելով «Գնումների մասին» ՀՀ օրենքի 36-րդ հոդվածի 3-րդ կետի պահանջները «Դառես» ՍՊԸ-ն զրկվել է պայմանագիր ստորագրելու իրավունքից:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՀՀ ՊՆ-ԳՀԾՁԲ-20-2/5» ծածկագրով հայտարարված գնման ընթացակարգի շրջանակներում «Դառես» ՍՊԸ-ի տվյալները՝ համապատասխան հիմքերով:

01.10.2020թ.-ի թիվ ՊՆ/Պն/02/3109-2020 գրությամբ Պատվիրատուն հայտնել է հետևյալը.

«ՀՀ ՊՆ-ԳՀԾՁԲ-20-2/5 ծածկագրով գնման ընթացակարգին ներկայացված հայտերի գնահատման արդյունքում 3, 4, 5, 6, 7, 8, 9 և 10-րդ չափաբաժինների մասով ընտրված (հաղթող) մասնակից է ճանաչվել «Դառես» ՍՊԸ-ն: Անգործության ժամկետի ավարտից հետո «Գնումների մասին» ՀՀ օրենքի 36-րդ հոդվածի համաձայն www.armeps.am համակարգի միջոցով «Դառես» ՍՊԸ-ին ներկայացվել է կնքվելիք պայմանագրի նախագիծը և ծանուցվել է պայմանագիր կնքելու վերաբերյալ, սակայն վերջինս 10 աշխատանքային օրվա ընթացքում չի ստորագրել պայմանագիրը և պատվիրատուին չի ներկայացրել պայմանագրի և որակավորման ապահովումները:

Հաշվի առնելով վերոգրյալը և հիմք ընդունելով «Գնումների մասին» ՀՀ օրենքի 36-րդ հոդվածի 3-րդ կետի պահանջները՝ «Դառես» ՍՊԸ-ն զրկվել է պայմանագիր ստորագրելու իրավունքից:

Ինչ վերաբերում է «Դառես» ՍՊԸ-ի ներկայացուցչի կողմից 21.08.2020թ-ին ՀՀ պաշտպանության նախարարություն մուտք գործելուն և պայմանագրի հաստատված օրինակները, պայմանագրի ու որակավորման ապահովումների բանկային երաշխիքները ներկայացնելուն, այդ, «Դառես» ՍՊԸ-ի ներկայացուցիչը նշված օրը մուտք է գործել ՀՀ պաշտպանության նախարարություն, սակայն հայտնում և հավաստիացնում եմ, որ վերջինս չի ներկայացրել ոչ պայմանագրի հաստատված օրինակները և ոչ էլ պայմանագրի և որակավորման ապահովումների բանկային երաշխիքները (միթե 21.08.2020թ-ին ՀՀ պաշտպանության նախարարություն մուտք գործելը վկայում է, որ «Դառես» ՍՊԸ-ն ներկայացրել է պահանջվող փաստաթղթերը՝ իհարկե ոչ:): «Դառես» ՍՊԸ-ն նշում է, որ

լիազորված ներկայացուցիչը ստորագրված պայմանագիրը, պայմանագրի և որակավորման ապահովումները՝ բանկային երաշխիքների տեսքով ներկայացրել է ՀՀ պաշտպանության նախարարության համապատասխան ստորաբաժանում, այնուհետև նշում է, որ պայմանագրի օրինակաները՝ պայմանագրի և որակավորման ապահովումներով ներկայացրել է գնահատող հանձնաժողովին, այնուհետև նշում է, որ վերը նշված փաստաթղթերը ներկայացրել է ընթացակարգի քարտուղարին: Վերջիվերջո «Դառես» ՍՊԸ-ն այդ փաստաթղթերը ում է ներկայացրել և որտեղ են այս պահին դրանք գտնվում:

«Դառես» ՍՊԸ-ն նշում է, որ տրամաբանական չէ պայմանագրի և որակավորման ապահովումներ ստանալու համար իր կողմից գույք գրավադրելը, վճարումներ կատարելը, եթե չէր ներկայանալու պայմանագիր կնքելու:

Քանի որ «Դառես» ՍՊԸ-ն փորձում է սույն հարցը տեղափոխել նաև տրամաբանության դաշտ, ուստի նշեմ, որ էլ ավելի անտրամաբանական է «Դառես» ՍՊԸ-ի վարքագիծը՝ հետևյալ պատճառաբանությամբ, փաստորեն ստացվում է, որ «Դառես» ՍՊԸ-ի ներկայացուցիչը 21.08.2020թ-ին մուտք է գործել ՀՀ պաշտպանության նախարարություն և պայմանագրի օրինակները՝ պայմանագրի և որակավորման ապահովումներով միաժամանակ ներկայացրել է և համապատասխան ստորաբաժանմանը և գնահատող հանձնաժողովին և ընթացակարգի քարտուղարին, ինչը ոչ միայն անտրամաբանական է այլ ֆիզիկապես անհնար: Անտրամաբանական է նաև գնահատող հանձնաժողովի կողմից «Դառես» ՍՊԸ-ին ընտրված մասնակից ճանաչելը, սակայն այնուհետև պայմանագիր չկնքելը:

Այնուամենայնիվ, 26.08.2020թ. «Դառես» ՍՊԸ-ն ծանուցված լինելով, որ զրկվել է պայմանագիր կնքելու իրավունքից ոչ մի քայլ չի ձեռնարկել իր իբր ուրնահարված շահը վերականգնելու ուղղությամբ: Ուր մնաց «Դառես» ՍՊԸ-ի տրամաբանությունը: Ավելին մինչ այս պահը չի էլ հետաքրքրվել թե 21.08.2020թ-ին իբր ներկայացված բանկային երաշխիքները որտեղ են, միթե «Դառես» ՍՊԸ-ն որոշել է գրավադրված գույքը զիջել բանկին (իսկ միգուցե այդ փաստաթղթերը գտնվում են Դառես» ՍՊԸ-ի մոտ):

Միաժամանակ տեղեկացնում ենք որ «ՀՀ ՊՆ-ԳՀԾՁԲ-20-2/5» ծածկագրով ԳՀ ընթացակարգ 3, 4, 5, 6, 7, 8, 9 և 10-րդ չափաբաժինների մասով հայտարարվել է չկայացած՝ հիմք ընդունելով «Գնումների մասին» ՀՀ օրենքի 37-րդ հոդվածի 1-ին կետի 4-րդ ենթակետը (պայմանագիր չի կնքվում):

Կրկին անգամ հավաստիացնում եմ, որ «Դառես» ՍՊԸ-ի պնդումը՝ պայմանագրի հաստատված օրինակները, պայմանագրի ու որակավորման ապահովումների բանկային երաշխիքները 21.08.2020թ-ին ՀՀ պաշտպանության նախարարություն ներկայացնելու

մասով չի համապատասխանում իրականությանը (պարվիրատուի փաստաթղթաշրջանառության համակարգում նման փաստաթղթեր չեն հաշվառվել):

Հաշվի առնելով վերոգրյալը գտնում ենք, որ առկա են բոլոր հիմքերը «Դառես» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու համար:»:

3. «Դառես» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 07.09.2020թ.-ին գրությամբ դիմել է «Դառես» ՍՊԸ-ին՝ հնարավորություն տալով ՀՀ ֆինանսների նախարարության կողմից 02.09.2020թ.-ի թիվ 26/26-1/13232-2020 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինպես նաև ծանուցված լինելով նիստերի տեղի, օրվա և ժամի մասին, ներկայանալով հրավիրված նիստին, 14.09.2020թ.-ին ներկայացրել է գրավոր դիրքորոշում, հայտնելով հետևյալը.

««Դառես» ՍՊԸ-ն մասնակցության հայտ է ներկայացրել ՀՀ պաշտպանության նախարարության կողմից հայտարարված «ՀՀ ՊՆ-ԳՀԾՁԲ-20-2/5» ծածկագրով գնանշման հարցման ընթացակարգին և ճանաչվել ընտրված մասնակից:

Այնուհետև Ընթացակարգի գնահատող հանձնաժողովի կողմից որոշում է կայացվել «Դառես» ՍՊԸ-ին ներկայացնել պայմանագիր կնքելու առաջարկ:

Ընթացակարգի գնահատող հանձնաժողովի կողմից 07.08.2020թ. «Դառես» ՍՊԸ-ին ներկայացվել է «ՀՀ ՊՆ-ԳՀԾՁԲ-20-2/5» ծածկագրով ընթացակարգի համար պայմանագիր կնքելու առաջարկ:

«ՀՀ ՊՆ-ԳՀԾՁԲ-20-2/5» ծածկագրով ընթացակարգի պայմանագիր կնքելու առաջարկը 07.08.2020թ. ստանալուց հետո՝ 10-րդ աշխատանքային օրը, այն է՝ 21.08.2020թ., «Դառես» ՍՊԸ-ի լիազորված ներկայացուցիչը՝ Մհեր Մխեյանը, «ՀԱՅԲԻՉԼԵՍԲԱՆԿ» ՓԲԸ-ից ստանալով որակավորման և պայմանագրի ապահովումները /բանկային երաշխիքներ թիվ 5288-02 և 5287-02, պատճենները կցվում են՝ /ներկայացել է ՀՀ պաշտպանության նախարարության՝ համապատասխան փաստաթղթերը/ «Դառես» ՍՊԸ-ի տնօրենի կողմից ստորագրած պայմանագիրը, ինչպես նաև բանկային երաշխիքներ թիվ 5288-02 և 5287-02՝ հանձնելով դրանք համապատասխան ստորաբաժանում:

Սակայն Ընթացակարգի գնահատող հանձնաժողովի կողմից 26.08.2020թ. տեղի ունեցած նիստի թիվ 4 արձանագրության 1.1 կետով արձանագրվել է, որ «Դառես» ՍՊԸ-ին

ներկայացվել է պայմանագիր կնքելու շնորհում և սահմանված ժամկետում պայմանագիր կնքելու նպատակով չեն ներկայացել ու չեն ներկայացրել բանկային երաշխիքները /պայմանագրի կատարման և որակավորման ապահովումները/՝ գնահատող հանձնաժողովը որոշեց հիմք ընդունելով «Գնումների մասին» ՀՀ օրենքի 36-րդ հոդվածի 3-րդ կետի պահանջները «Դառես» ՍՊԸ-ին ճանաչել պայմանագիր ստորագրելու իրավունքից զրկված մասնակից:

Գործի իրավական հիմքերը և հիմնավորումները՝

ՀՀ Սահմանադրության 86-րդ հոդվածի 1-ին մասի 1-ին կետի համաձայն՝ Կոնստիտուցիոնալ, սոցիալական և մշակութային ոլորտներում պետության քաղաքականության հիմնական նպատակներն են գործարար միջավայրի բարելավումը և ձեռնարկատիրության խթանումը:

«Գնումների մասին» ՀՀ օրենքի (այսուհետ՝ նաև Օրենք) 3-րդ հոդվածի 2-րդ մասի համաձայն՝ գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:

Գնումների հետ կապված բողոքներ քննող անձի ուշադրությունն ենք հրավիրում հետևյալ հանգամանքների վրա.

Ընթացակարգերի հրավերի ՄԱՍ 1-ի 10.2 կետի՝ մասնակիցը ընտրված մասնակից ճանաչվելու դեպքում, Օրենքի 35-րդ հոդվածով սահմանված ժամկետում և կարգով ներկայացնում է որակավորման ապահովում՝ շինարարական աշխատանքի գնման համար սահմանված կարգով հաստատված ծավալաթերթ-նախահաշվով նախատեսված արժեքի պասը փոկոսի չափով:

Որակավորման ապահովումը ներկայացվում է բանկային երաշխիքի ձևով (հավելված 4), որը պետք է վավեր լինի առնվազն մինչև պայմանագրով (համաձայնագրով) ստանձնած պարտավորությունների ամբողջական կատարմանը հաջորդող 20-րդ աշխատանքային օրը ներառյալ:

Նույն Ընթացակարգերի հրավերի ՄԱՍ 1-ի 10.3 կետի՝ Պայմանագրի ապահովման չափը կազմում է կնքվելիք պայմանագրի գնի 10 տոկոսը: Պայմանագրի ապահովումը ներկայացվում է բանկային երախիքի (հավելված 5) կամ կանխիկ փողի ձևով:

Եթե գնման ընթացակարգը կազմակերպված է չափաբաժիններով և մասնակիցը ընտրված մասնակից է ճանաչվում մեկից ավելի չափաբաժինների մասով ու վերջինիս հետ կնքվող պայմանագրի ընդհանուր գինը գերազանցում է 10 մլն. ՀՀ դրամը, ապա պայմանագրի ապահովումը ներկայացվում է բանկային երաշխիքի ձևով՝ պայմանագրի ընդհանուր գնի 10 տոկոսի չափով:

Պայմանագրի ապահովումը պետք է վավեր լինի առնվազն մինչև կնքվելիք պայմանագրով սահմանվող պարտավորությունների ամբողջական կատարման վերջին օրվան հաջորդող 20-րդ աշխատանքային օրը ներառյալ: Պայմանագրի ապահովումը այն ներկայացրած անձին վերադարձվում է կնքված պայմանագրով ստանձնված պարտավորությունների ամբողջական կատարման դեպքում՝ ամբողջական պարտավորությունների կատարման ժամկետը լրանալուն հաջորդող 5 աշխատանքային օրվա ընթացքում:

Հայտնում ենք, որ «Դառես» ՍՊԸ-ի կողմից սահմանված ժամկետում գնահատող հանձնաժողովին է ներկայացվել՝ «ՀՀ ՊՆ-ԳՀԾՁԲ-20-2/5» ծածկագրով գնման ընթացակարգի ՍՊԸ-ի կողմից հաստատված պայմանագրի օրինակները՝ պայմանագրի և որակավորման ապահովումներով:

Սակայն Ընթացակարգի գնահատող հանձնաժողովի կողմից 26.08.2020թ. տեղի ունեցած նիստի թիվ 4 արձանագրության 1.1 կետով արձանագրվել է, որ «Դառես» ՍՊԸ-ն պայմանագրի նախագիծը ստանալուց հետո փաս աշխատանքային օրվա ընթացքում՝ սահմանված ժամկետում չի ներկայացել պայմանագիր կնքելու և չի ներկայացրել որակավորման և պայմանագրի ապահովումները, ուստի Ընկերությունը զրկվում է պայմանագիր կնքելու իրավունքից:

Գնումների հետ կապված բողոքներ քննող անձին խնդրում են նկատի ունենալ մի շար կարևոր հանգամանք.

21.08.2020թ. «Դառես» ՍՊԸ-ի ներկայացուցիչ Մհեր Մխեյանը համապատասխան լիազորագրի առկայությամբ անցագրային բաժնի միջոցով մուտք է գործել ՀՀ պաշտպանության նախարարություն՝ ընթացակարգի քարտուղարին ներկայացնելով «ՀՀ ՊՆ-ԳՀԾՁԲ-20-2/5» ծածկագրով գնման ընթացակարգի ՍՊԸ-ի կողմից հաստատված պայմանագրի օրինակները՝ պայմանագրի և որակավորման ապահովումներով:

Վերը նշված հանգամանքը հնարավոր է պարզել նաև պաշտոնական հարցում կատարելով ՀՀ ՊՆ, որի անցագրային բաժնից ստացված տեղեկությունից պարզ կդառնա, որ «Դառես» ՍՊԸ-ի ներկայացուցիչը համապատասխան լիազորագրով 21.08.2020թ. մուտք է գործել ՀՀ ՊՆ:

Հաջորդ կարևորագույն հանգամանքը կայանում է նրանում, որ ներկա պահին «Դառես» ՍՊԸ-ի մուր են գտնվում «ՀԱՅԲԻՉՆԵՍԲԱՆԿ» ՓԲԸ-ի կողմից տրամադրված՝ «ՀՀ ՊՆ-ԳՀԾՁԲ-20-2/5» ծածկագրով գնման ընթացակարգի շրջանակներում կնքվելիք պայմանագրի որակավորման և պայմանագրի ապահովումների /բանկային երաշխիքներ թիվ 5288-02 և 5287-02/ պատճենները, նաև սկանավորված տարբերակներով/ և տրամաբանական չէ, թե ինչու պետք էր «Դառես» ՍՊԸ-ն կատարեր գույքի գրավադրում՝ կատարել վճարումներ ձեռք բերելու որակավորման և պայմանագրի ապահովումներ՝ բանկային երաշխիքներ, եթե չէր ներկայանալու պայմանագիր կնքելու:

Վերը նշված հանգամանքը փաստելու նպատակով «Դառես» ՍՊԸ-ն հարցում է ներկայացրել «ՀԱՅԲԻՉՆԵՍԲԱՆԿ» ՓԲԸ-ին, որով խնդրել ենք հայտնել, թե «ՀԱՅԲԻՉՆԵՍԲԱՆԿ» ՓԲԸ-ի կողմից «ՀՀ ՊՆ-ԳՀԾՁԲ-20-2/5» ծածկագրով գնման ընթացակարգի շրջանակներում կնքվելիք պայմանագրի որակավորման և պայմանագրի ապահովումները՝ բանկային երաշխիքները, երբ են տրամադրվել «Դառես» ՍՊԸ-ին:

Ամփոփելով վերը նշված փաստերն ու փաստական հանգամանքները՝ գտնում ենք, որ սույն ընթացակարգի օբյեկտիվ քննության նպատակով պայմանավորված՝ բողոքներ քննող անձը չի կարող անտեսել այն հանգամանքը, որ ՍՊԸ-ի լիազորված ներկայացուցիչը մուտք է գործել ՀՀ պաշտպանության նախարարություն՝ «ՀՀ ՊՆ-ԳՀԾՁԲ-20-2/5» ծածկագրով գնման ընթացակարգի շրջանակներում կնքվելիք պայմանագրի օրինակները, որակավորման և պայմանագրի ապահովումների /բանկային երաշխիքներ թիվ 5288-02 և 5287-02/ հետ միասին և չի կարող հիմնավորված համարել Պատվիրատուի բերած այն հիմնավորումը, որ «Դառես» ՍՊԸ-ն սահմանված ժամկետում չի ներկայացրել պայմանագիր կնքելու ու չի ներկայացրել բանկային երաշխիքները /պայմանագրի կատարման և որակավորման ապահովումները/:

Մինչդեռ՝ ՀՀ քաղաքացիական դատավարության օրենսգրքի 62-րդ հոդվածի 1-ին մասի համաձայն՝ գործին մասնակցող յուրաքանչյուր անձ պարտավոր է ապացուցել իր պահանջների և առարկությունների հիմքում դրված ու գործի լուծման համար նշանակություն ունեցող փաստերը, եթե այլ բան նախատեսված չէ սույն օրենսգրքով կամ այլ օրենքներով:

«Հ քաղաքացիական դատավարության օրենսգրքի 62-րդ հոդվածի 6-րդ մասի համաձայն՝ եթե բոլոր ապացույցների հետազոտումից և գնահատումից հետո վիճելի է մնում փաստի առկայությունը կամ բացակայությունը, ապա դրա բացասական հետևանքները կրում է այդ փաստի ապացուցման պարտականությունը կրող անձը:

Վերոհիշյալի արդյունքում Ընկերության պայմանագիր կնքելու իրավունքից զրկելը իր հերթին հանգեցրել է «Դառես» ՍՊԸ-ի մասով գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով պաշտոնական ընթացակարգ նախաձեռնելուն և կանգնեցրել Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառվելու վրանգի առջև:»:

Ելնելով վերոնշված փաստերից ու փաստական հանգամանքներից, Մասնակիցը Բողոքներ քննող անձին խնդրել է «Դառես» ՍՊԸ-ին չվերագրել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի որևէ խախտում, և վերջինիսի չներառել «Գնումների գործընթացին մասնակցելու իրավունք չունեցող մասնակիցների ցուցակում:

Մասնակցի ներկայացուցիչը ներկայանալով 02.10.2020թ.-ի հրավիրված նիստին, հանդես է եկել միջնորդությամբ, առ այն, որ Մասնակիցը հրաժարվում է Բողոքներ քննող անձին 14.09.2020թ.-ի ներկայացված դիրքորոշումից և և խնդրում է այն քննության չառնել:

4. ՍՑ-ԼՕ-2020/201 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. ՀՀ պաշտպանության նախարարության (այսուհետ նաև՝ Պատվիրատու) կողմից շարժական թիրախային բնագծերի վերանորոգման ծառայությունների ձեռքբերման նպատակով 03.07.2020թ.-ին հայտարարվել է «ՀՀ ՊՆ-ԳՀԾՁԲ-20-2/5» ծածկագրով գնանշման հարցման ընթացակարգ (այսուհետ նաև՝ Ընթացակարգ), որին մասնակցելու նպատակով հայտ է ներկայացրել նաև «Դառես» ՍՊԸ-ն:

ii. «Դառես» ՍՊԸ-ն մասնակցության հայտի թիվ 1 հավելվածով՝ գնանշման հարցման ընթացակարգին մասնակցելու դիմում-հայտարարությամբ, հայտարարել և հավաստել է, որ բավարարում է «ՀՀ ՊՆ-ԳՀԾՁԲ-20-2/5» ծածկագրով գնման ընթացակարգի հրավերով սահմանված մասնակցության իրավունքի պահանջներին և պարտավորվում է ընտրված մասնակից ճանաչվելու դեպքում, հրավերով սահմանված

կարգով և ժամկետում, ներկայացնել գնային առաջարկի չափով որակավորման ապահովում:

iii. Ընթացակարգի գնահատող հանձնաժողովի (այսուհետ նաև՝ Հանձնաժողով) 27.07.2020թ.-ի նիստի թիվ 3 արձանագրության համաձայն՝ Հանձնաժողովը որոշել է 3-10-րդ չափաբաժինների մասով ընտրված /հաղթող/ մասնակից ճանաչել «Դառես» ՍՊԸ-ին:

iv. 27.07.2020թ.-ին պայմանագիր կնքելու նպատակով գնումների պաշտոնական տեղեկագրում՝ www.gnumner.am կայքում Հանձնաժողովի կողմից հրապարակվել է պայմանագիր կնքելու որոշման մասին հայտարարություն և սահմանվել է անգործության ժամկետ՝ հայտարարությունը հրապարակվելու օրվան հաջորդող օրվանից 5-րդ օրացույցային օրը ներառյալ:

v. Պատվիրատուն 07.08.2020թ.-ին Մասնակցին ներկայացրել է «ՀՀ ՊՆ-ԳՀԾՁԲ-20-2/5» ծածկագրով պայմանագրի նախագիծը և հայտնել, որ անհրաժեշտ է ծանուցումն ստանալուց հետո հրավերով սահմանված ժամկետում կազմել պայմանագրի կատարման ապահովումը, ստուգել պայմանագրի նախագիծը և ստորագրելու համար ներկայանալ ՀՀ ՊՆ ԳԿ վարչություն, ինչպես նաև անհրաժեշտ է Armeps համակարգում պատասխանել պայմանագրի շնորհմանը:

vi. 26.08.2020թ.-ի նիստի թիվ 4 արձանագրության համաձայն՝ Հանձնաժողովն արձանագրել է, որ «Դառես» ՍՊԸ-ն սահմանված ժամկետում չի ներկայացրել պայմանագիր կնքելու նպատակով և չի ներկայացրել պայմանագրի կատարման և որակավորման ապահովումները, ինչի արդյունքում Հանձնաժողովը հիմք ընդունելով «Գնումների մասին» ՀՀ օրենքի 36-րդ հոդվածի 3-րդ կետի պահանջները որոշել է «Դառես» ՍՊԸ-ին զրկվել պայմանագիր կնքելու իրավունքից:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակցության, որ ՀՀ ֆինանսների նախարարության կողմից 02.09.2020թ.-ի թիվ 26/26-1/13232-2020 գրությամբ «Դառես» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» և «բ» ենթակետերի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, և որպես ընտրված մասնակից հրաժարվել է պայմանագիր կնքելուց:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի 3-րդ մասի համաձայն՝ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 12-րդ և 13-րդ ենթակետերի համաձայն՝ ընտրված մասնակցին պայմանագիր կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը: Ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում:

Պատվիրատուի ղեկավարի կողմից պայմանագրի նախագիծը հաստատվում է այդ հրավասության առաջացմանը հաջորդող երկու աշխատանքային օրվա ընթացքում:

Նույն կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Կարգի 50-րդ կետի համաձայն՝ ընտրված մասնակցի հետ պայմանագիրը կնքվում է օրենքի 10-րդ և 36-րդ հոդվածներով նախատեսված կարգով, եթե ներկայացվել է նաև որակավորման ապահովումը հիմնավորող փաստաթուղթը: Ընդ որում, ապրանքների գնման դեպքում ապրանքի ամբողջական նկարագիրը պայմանագրում ներառվում է՝ համաձայն ընտրված մասնակցի կողմից ներկայացված և գնահատող հանձնաժողովի կողմից բավարար գնահատված առաջարկի:

Վերոնշյալ դրույթների համակարգված վերլուծության արդյունքում, Բողոքներ քննող անձը փաստում է, որ ընտրված մասնակիցը, հանձնաժողովի քարտուղարի կողմից էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, պարտավոր է 10 աշխատանքային օրվա ընթացքում պատվիրատուին ներկայացնել իր կողմից հաստատված պայմանագրի նախագիծը, որակավորման և պայմանագրի կատարման ապահովումը:

Ընդ որում, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին չի ներկայացնում ներկայացված գնային առաջարկի չափով որակավորման ապահովում, ապա այդ հանգամանքը համարվում է որպես գնման գործընթացի շրջանակում ստանձնած պարտավորության խախտում, ինչպես

նաև չներկայացնելով պայմանագրի ապահովում, վերջինս գրկվում է պայմանագիրը ստորագրելու իրավունքից:

Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը, ինչպես նաև վերջինիս գործողությունները (անգործությունը) գնահատվում են որպես պայմանագիր կնքելուց ընտրված մասնակցի կողմից հրաժարում:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում՝ երկու տարի ժամկետով, քանի որ խախտել է գնման գործընթացի շրջանակում ստանձնած պարտավորությունը՝ հրավերով սահմանված կարգով և ժամկետում չներկայացնելով որակավորման ապահովում, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը, ինչպես նաև պատվիրատուին չներկայացնելով պայմանագրի օրինակը և/կամ ապահովումը գրկվել է պայմանագիր կնքելու իրավունքից:

Սույն գործի փաստերի հիման վրա Բողոքներ քննող անձն արձանագրում է, որ ՀՀ պաշտպանության նախարարության կողմից շարժական թիրախային բնագծերի վերանորոգման ծառայությունների ձեռքբերման նպատակով 03.07.2020թ.-ին հայտարարված «ՀՀ ՊՆ-ԳՀԾՁԲ-20-2/5» գնանշման հարցման ընթացակարգին մասնակցելու նպատակով հայտ ներկայացրած «Դառես» ՍՊԸ-ն Հանձնաժողովի 27.07.2020թ.-ի նիստի թիվ 3 արձանագրությամբ կայացված որոշմամբ ընթացակարգի 3-10-րդ չափաբաժինների մասով ճանաչվել է հաղթող մասնակից և վերջինիս ներկայացվել է պայմանագիր կնքելու առաջարկ:

Պատվիրատուն 07.08.2020թ.-ին Մասնակցին ներկայացնելով «ՀՀ ՊՆ-ԳՀԾՁԲ-20-2/5» ծածկագրով պայմանագրի նախագիծը՝ հայտնել է, որ անհրաժեշտ է ծանուցումն ստանալուց հետո հրավերով սահմանված ժամկետում կազմել պայմանագրի կատարման ապահովումը, ստուգել պայմանագրի նախագիծը և ստորագրելու համար ներկայանալ ՀՀ ՊՆ ԳԿ վարչություն, ինչպես նաև անհրաժեշտ է Armeps համակարգում պատասխանել պայմանագրի շնորհմանը:

Հանձնաժողովի 26.08.2020թ.-ի նիստի թիվ 4 արձանագրության համաձայն՝ Հանձնաժողովն արձանագրել է, որ «Դառես» ՍՊԸ-ն սահմանված ժամկետում չի ստորագրել պայմանագիրը և Պատվիրատուին չի ներկայացրել պայմանագիրը,

որակավորման և պայմանագրի ապահովումները և հիմք ընդունելով «Գնումների մասին» ՀՀ օրենքի 36-րդ հոդվածի 3-րդ կետի պահանջները որոշել է «Դառես» ՍՊԸ-ին զրկվել պայմանագիր կնքելու իրավունքից:

Վերոգրյալ նորմերի համակարգված վերլուծության արդյունքում, դրանք համադրելով գործում առկա փաստերին, Բողոքներ քննող անձը փաստում է, որ «Դառես» ՍՊԸ-ի կողմից ստանձնած պարտավորությունների խախտմանը նպաստել է Հանձնաժողովի քարտուղարի կողմից Կարգի 32-րդ կետի 12-րդ և 13-րդ ենթակետերի դրույթների սխալ կիրառումը, այն է՝ Մասնակցին ուղարկված ծանուցմամբ նշվել է, որ պայմանագիրը ստորագրելու համար պետք է ներկայանալ ՀՀ ՊՆ ԳԿ վարչություն, այն դեպքում, երբ ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում:

Ընդ որում, Բողոքներ քննող անձը հարկ է համարում փաստել, որ գործում առկա «Հայբիզնեսբանկ» ՓԲԸ-ի կողմից 21.08.2020թ.-ին Մասնակցին տրամադրված թիվ 5288-02 որակավորման և թիվ 5287-02 պայմանագրի ապահովման բանկային երաշխիքների առկայությունն ինքնին բացառում է Մասնակցի կողմից պայմանագիր կնքելուց հրաժարվելուն ուղղված անգործության մատնվելու հանգամանքը:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա գրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նշված իրավանորմերի վերլուծության հիման վրա, Բողոքներ քննող անձը եզրահանգում է, որ Օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի

շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվել: Այսինքն՝ միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում Բողոքներ քննող անձը հանգում է այն եզրակացության, որ սույն դեպքում Պատվիրատուի կողմից Կարգի 32-րդ կետի 12-րդ և 13-րդ ենթակետերի սխալ կիրառումը հանգեցրել և նպաստել է Մասնակցի կողմից ստանձնած պարտավորությունների չկատարմանը, որպիսի պարագայում «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերում նշված պատասխանատվությունը չի կարող վրա հասնել ու հանգեցնել Մասնակցին՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը.

Ո Ր Ո Շ Ե Ց

ՀՀ ֆինանսների նախարարության կողմից 02.09.2020թ.-ի թիվ 26/26-1/13232-2020 գրությամբ «Դառես» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՅ-ԼՕ-2020/201 ծածկագրով ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊԿԱԾ
ԲՈՂՈՔՆԵՐ ՔՆՆՈՂ ԱՆԶ՝**



ԼԵՎՈՆ ՕՇԱՆՅԱՆ